

OTOOTOGA

Ave faamalosi se teine laitiiti

O loo sailia pea e leoleo le tagata na ia ave faamalosi se teine 5 tausaga i Palmerston North i le vaiaso talu ai. E to'atolu se auuso teine, 5, 7 & 8 na aga atu i lo latou aiga ae faafetaia'i mai e se tamaloa i lana taavale ma segia ai le 5 tausaga, a o taumafai atu ona uso e lavea'i. Na logo leoleo ae na vave ona toe maua le teine na'o ia i se tulimanu, e se tamāmatua na ui ane.

Fesaga'i pea nisi fanau ma le pefu

Faapea na'o malo tauatia'e e maua ai auala pefu ae maua lava i Niu Sila foi. Ua logo Niu Sila i le faitioga a le faipule o Northland, Winston Peters, i le le faia o le tiute o le malo mo nisi o fanau a le atunuu. To'atele fanau i nisi tulimanu o lea itumalo e usu ma le pefu i le a'oga toe fo'i mai ma le pefu, ona o auala e lei faatāina.

Taugata Aukilani mo fanau a'oga

Ua aga'i ina le toe ausia e le fanau a'oga matutua le tau o fale mautotogi i totonu o le moa o le taulaga o Aukilani. O le to'atele o i latou e aga'i i iunivesite o loo iai i totonu o le taulaga, na ta'utino i le faigata talu ai le siita'i o totagi o fale ua iai nei. Tusa ma se \$125 se tinoitupe e mana'omia e tuumama ai le avega mo le to'atasi.

Feteena'i iunivesite i le RR

O loo feteena'i ni a'oga se lua i le aoga o le polokalame Reading Recovery lea ua loa le faata'ita'ia i Niu Sila ma Ausetalia fo'i. Fai mai le polofesa a Massey ua uma aso o le RR, ae puipui mai le polofesa a Canterbury e lagolagoina le polokalame. E iai le isi polokalame lea ua faaofi mai i totonu, o lana auala o le faitau faatasi i se kulupu ae le o le fai ta'ito'atasi e pei o le tu i le RR. Ua iloa ni itu lelei o le faiga fou lea.



MANUALOFA: "Fai atu foi la, tiga na ta matutua ae pei lava o lea ta te laiti," o le tala lea a Jack i lana uo o Rose, a o nofonofo i lalo o se niu i gauta o Aeale.

Filifilia se laulau fou mo Aukilani

Ua mae'a le faamoemoe sa loma mo le FAGASA a Aukilani, o le filifilia lea o se laulau fou e tauavea i luma le galuega.

O le faaiuga o le vaiaso ua tuana'i na faataunuu ai le filifiliga i le lotoa a'oga a

Sutton Park i Magele. Ma ua tasi ai le filifiliga ia Sisi Key, o ia ua avea ma peresetene fou o le lala. O le failautusi fou o Akenese Taefu, a o le teutupe o Sapi Neemia.

O nei filifiliga na faaluaina ma lagolagoina lava e le aufono.

O se taimi o i luma e folafola aloa'ia ai o latou tofiga pe a mae'a se fono a le laulaufono



Pule A'oga Samoa ma Sisi Key, tuloto i lalo (laei meamata). Ata: Karl Vasau

aoao e faamamaluina ai.

O le peresetene fou o ia foi o le pulea'oga a Fergusson Intermediate, ua leva foi ona galue i le faiva. E faapena foi le failautusi ma le teutupe o ni faia'oga lava i totonu o Aukilani.

O le sa tauavea le tofiga ta'ita'i o le afioga ia Tuiavii Eliu Samuelu.

O le lala a le FAGASA i Aukilani o se tasi lala faavae a lea faalapopotoga talu lona afuaina mai i le amataga.

*Ripoti o le Vaiaso:***Tuua'iina le Matagaluega i le fa'aaogaga o tupe**

O loo feagai nei le Matagaluega o A'oga ma se osofa'iga malosi mai le Itu Agai e mafua i le fa'aaogaga o tupe.

O le Aso Lulu o le vaiaso talu ai na tali ai lona ulumatagaluega i fesili a se komiti a le maota e faatatau i se galuega ua faaupuina e se tasi faipule ua 'ova i le tumutumu.'

E faatatau lea i se galuega e toe faalelei ai se ofisa mo a'oga faapitoa, e aofia ai ma se ala savali ua faaigoa e le Itu Agai o le ala faaapefa'i i le lagi. A tuufaatasi le tau e lata i se \$3 miliona lona aofa'i.

Na faamaonia e le taiulu o le matagaluega, Peter Hughes le \$3 miliona, ma se \$27 miliona e faaalu i le tologiga o le avanoa, ma tau faaalu mo le 15 tausaga o le lisi.

O le faasea mai le fofoga o mataupu taua'oga a le Green na fesiligia ai pe faapefea ona faaalu ni miliona i le faaleleiga o se ofisa, ae tuu ane i isi vaega o le tautua i a'oga faapitoa o loo iai ni faaletonu.

E lei mamao atu tuua'iga a le Itu Agai i le matagaluega ona o se \$32 miliona o tupe mo fanau o mana'oga faapitoa o loo taofi e le matagaluega ua atoa nei se lua tausaga.

"E foliga e sili le taua o mea tou te galulue ai i lo fanau ma mea e tua i ai," o le faasea lea a Catherine Delahunty.

O le fofoga a le Leipa o mea taua'oga, Chris Hipkins, na ia lafo le faaupuga, ua ova ma le tumutumu.

I se upu e foliga e tauaifai, na ia fesili ai pe le o le alafaataaliolio lenei i le lagi, pe le o le ala lenei i se suiga faapitoa o ausiga a tamaiti pe a fua i le tupe ua faaalu.

I le tulaga i meafale e tusa ma se \$3000 ua faaaluina mo le tagata faigaluega e to'atasi. Tusa lea ma se \$3.2 miliona le tau aofa'i.

Ae na tali Hughes e le faatusalia le tupe ua faaalu i meafale mo le aufaigaluega ma tupe o loo fa'aalu i le faaleleia o a'oga i le atunuu. O lona manatu e le tatau ona faatusatusa apu ma moli.

Na tapa e le komiti le tatau ona faailoa ane le igoa o le kamupani na



Peter Hughes: pule o le Matagaluega

aumai ai meafale faatasi ma tau o mea ta'itasi.

I lana puipuiga o le fuafuaga mo se ala savali na ia ta'ua ai le le lava o lifi e fa o loo iai i le fale.

O le mea lea e mana'omia ai se ala savali e tuumama ai le avega. Saunoa Hughes, e sili atu le taugata o se lifi fou i lo le ala savali. O le tau o se lifi fou pe a ma se \$4 miliona.

O isi suiga e aofia ai le faalaloina o tau faaalu i telefoni. Faiga tuai sa tofu le tagata ma le telefoni i luga o lana laulau, faiga fou, o le a tofu le tagata faigaluega ma se seti e faamau i lona ao e faaoga faatasi ma le Skype. O le a faasaina mai ai se \$330,000 i le tausaga.

O iai se fuafuaga i le matagaluega e faata'ita'ia le faiga fou lea e ta'ua i le gagana Peretania o le 'faalaulau vevela' (hot desking). O lona uiga e tasi le laulau ae auaua'i i ai le aufaigaluega. O le a faatalaloa le ofisa, o lona uiga e le toe iai ni potu e pei o le faiga masani a o le a galulue faatasi uma i se fola taalaelae e tasi. E oo foi i le ulumatagaluega e leai sona ofisa.

E le o se taimi muamua lea ua faitioina ai se matagaluega a le malo i le soona faaalu vale o tupe a le atunuu.

I le tausaga talu ai na fesiligia ai le minisita o galuega ma atina'e i se tioata faasalalau e \$140,000 atoa ai ma se masini e faasasa'o ai laufofoga o lana matagaluega.

E \$600 miliona le tupe e avatu e le malo e faatino ai galuega a le Matagaluega o A'oga a Niu Sila i tausaga ta'itasi.

Faailoa se popolega malosi i le utiuti o tomai faapitoa faia'oga

Ua faaalua se popolega malosi o le peresetene o le Asosi a Pule A'oga o Kolisi a Niu Sila (SPA), le tamaitai o Sandy Pasley, e faatatau i le tulaga utiuti o tomai faapitoa ua matauina i le faiva faia'oga i lenei vaitaimi.

E faatatau le lafoga i le tau leai o ni faia'oga e faatumuina avanoa mo tomai aupito moomia e a'oga i lenei lava taimi. O tomai nei e pei ona aofa'ia i mata'itusi e fa STEM—Saienisi, Tekonolosi, Enisinia, ma le Matematika.

I le taimi nei, saunoa le peresetene, ua aga'i ina tuga tele le tulaga ua aliali mai. I nisi a'oga ua tatala le avanoa i faia'oga malolo e toe ulufale ai.

O nisi ua faatuatua le malolo talu ai le leai o ni sui. I le taimi nei e to'atele i latou i le vasega ma o le popolega o le sooga o le fau mai ia i latou i se soloa'iga fou e fa'aaua le fe'au.

O nisi a'oga ua tatala le avanoa e talosaga ai faia'oga mai fafo. O le to'atele o e tali mai o faia'oga mai fafo.

I le tausaga talu ai e 1849 avanoa na faasalalau, e faatusatusa i le 1300 i le 2013. A o avanoa aupito saili gata o na i lalo o mata'itusi e fa—STEM.

Na ta'ua e Pasley e faapea o le tasi vaega o le faafitauli o le le mafai e le malo ona faatosina mai fanau a'oga o i iunivesite i totonu o le faiva. O nisi e iu mai a'oga ma tuuvaa ese loa e saili galuega i isi atunuu. O le to'atele o i latou na o fanau sa maua ni pasi maua i nei mataupu, peitai ua tuua le atunuu ona o le lelei o totogi ofoina mai e isi malo e iai Peretania mo se faata'ita'iga.

E faapena foi se tulaga ua aliali mai i le vasega o pulea'oga. I le tausaga talu ai e 63 ni avanoa na faasalalau, o se siitaga maua ua matauina.

O le uiga lea o nisi taulagalaga a le malo e totogi fua a'oga mo le fanau e aveina nei mataupu, ma se tausaga e toleni ai i le galuega, e vave faatumu ai avanoa o loo moomia e a'oga.

*Faasoa o le Vaiaso:***O le ki i se olaga maloloina o le mafai ona pulea le ita**

A o lei amatā le faasoa e fia faamanino muamua le tulaga lenei. E muamua lauga le matua i le o loo tapenaina le faasoa auā o lona vaivaiga foi lea, o le le puleaina o lona ita. E faapea atu ai, o lenei faasoa o se lauga a le o loo tautala ia te ia lava, ae atonu foi e aoga se manatu i le faapulapulaina o lenei mataupu taua ma aafia ai le to'atele.

O le ita o se lagona e maua i tagata ola uma (tulou). A le ita se tasi e le o se tagata maloloina. E oo lava i le Faaola. A le inoino o lona uiga e lei tofo i le olaga o mea moni, le tiga ma le manu'anu'a i le loto.

Ae pei ona fautua mai le Tusi, ia aua ona goto le la o e ita pea. Aisea? Auā fai mai foma'i e afaina ai lou soifua ma lo'u ola maloloina. E aafia ai so tatou ola fiafia. E aafia ai isi, o e pele ia i tatou, o tatou aiga, le va ma uso, uo ma mafutaga masani.

Ae sa'o foi si alii faasoa, e faigofie lava le faalele ae faigata le faatino. Ua tatou iloa uma lava, se'i vagana le tagata ua sao lona ala, ma ave i ai e le Alii le pusa onosa'i e pei o lopu.

Ae taua lava le taumafai.

O le tasi meaalofa na aumai ia i tatou (tagata) e le Alii, o le mafai lea ona tatou tomanatu ma iloilo mea sa tatou faia, o tatou lagona faaali ma aafiaga, ma mafai ai ona tatou faia ni faamasinoga lelei e toe fuata'iina ai le auiluma.

E le tau faamatalaina le tulaga o siosiomaga faalegaluega i nei aso. Mai le sologa faimalie ma le faigofie sa masani ai i le saosaoa taavilivili ua iai nei ma lutia ai le mafaufau. A faaopoopo la i ai ma avega a lagona (ft., ita, popole, faanoanoa) ona tula'i mai lea o se mauga o faafitauli e le faigofie ona faato'ilalo. O le iuga o le ma'i, pe iu lava i se taunuuga e sili le faanoanoa ai.

Mo le galuega faia'oga lava ia e tau mai luma tau mai tua le lagona fe'oma'i, e le gata i le nofoaga faigaluega a o le aiga, ma mafutaga

e auai atu i ai. I na foi vaega o iai ni tiute tauave atoa ma faafitauli.

A masani se tamā po o se tina i le lotoita e aliali lava i uiga o le fanau i le a'oga. E taumate se iuga manuia mo se tamaitiiti lotoita. O latou na e faia le amio faaosala i lotoa a'oga, e iu ina avea nisi ma ni faasoesa i tagata ma le tulafono mulimuli ane.

Ua tatou masani i le upu Classroom Management (pulega faapotua'oga a le faia'oga) ae manatu nisi e amata se pulaga lelei mai le tomai e pulea tatou lava, i le mafaufau lelei ae le o le ita.

O le fesili mo a'u lava, e faapefea ona ou pulea lo'u ita? E faapefea ona ou faatonutonu so'u lagona pe a fesaga'i ma se lu'i faapea ma faapea? E faapefea ona ou faatonutonu lo'u ita ina ia le afaina ai o a'u lava ma so'u ta'uleleia? O ni fesili taua nei ae le fou i le faafofoga.

Fai mai nisi e le tutusa le foa'i a le Alii i tagata i uiga tusaafia. O isi e maeu le onosa'i, e te manatu i nisi taimi pe aisea e ese ai lea tagata mai ia te oe. O isi foi e maeu le faalilii, lotoita, o la latou aupega lena i se lu'itau e fufu mai. Afai o le fua o le 1 i le 10, ou te taumafai ia le sili a'e i le 6, auā e leai se isi e naunau e mafuta ma se tagata ita i le va o le 8 ma le 10.

E taua le pulea o lou ita ma lo'u ita. O le ki lena i se olaga faigaluega maloloina, e fua mai i le ola tulutulu'i.

E leai se mea e ta'u o se fiafia atoatoa i lenei olaga o tiga ma lu'itau, pe manatu ta te sao mai i le taaviliga a le olaga o upu faatiga ma le fetuu, o aga na a le olaga e pei o le mau a le faia'oga ta'uta'ua o Puta. Ae mafai lava ona tatou faatonutonu le ita, ma iu ai ina avea ona tiga o ni mea noa i le mafaufau ma le loto.

E le na'o le pau lea o le ki i le ola maloloina, ae talitonu o se ki taua.

“mafaufauga o le vaiaso”

*A ita le fafine, e oo i temoni e taufetuli
Se upu mai se tusi anamua*

*Tulimanu a Dr Popa:***Alefapeta,
saogalemu, ma
igoa o tamaiti**

Malo le folau manuia! Muamua la'u faafetai i nisi o a tatou paaga sa fesoota'i mai i le imeli, faafetai lava.

O le fesili a Faaitu po o fea le sipela sa'o, alefapeta poo le alefapeti. Ia, tailo. Manatua foi e leai se Samoa e le polofesa i le sipela, pule oe poo fea le sa'o. Fai mai Pole ia o le alefapeto. Pei a o le faasipaniolo lena.

Sa ou ta'ua la'u asiasiga i le a'oga i le vaiaso lela. Ua saga faamautuina ai la'u sailiga, ua tau le maua ni igoa Samoa moni ia tatou tupulaga lalovaoa iinei ma Samoa foi. I le vasega lea sa ou asia e augapiu ma se isi e igoa Samoa, a o isi igoa e tau mapeva lota gutu e ta'u (tulou). Geneshuristica!!!

Ou te le faatalaula ae oka le tele o a tatou igoa mananaia: Aute, Aniva, Seioaana, Savaliiofilemu, Salafai, e oo lava i nai igoa taitolu mataitusi.

Malie foi, e iai tamaiti na pa'u'u mai loa i le lalolagi, faasuafa loa e o latou matua i suafa matai. Pei e lelei lena mo tatou iinei. E ola a'e lava le tama a ua suafa, e le toe alu fua i Samoa e fai se saofa'i ua taugata pusaapa. O nisi o ni suafa taua, ae leai se mea o iai.

Pau le tuualalo, aua ne'i faaigoaina se tama ia Hitler, Tin Tin, Batman, Mickey Mouse—ia, poo Masima.

E le tio se isi i le alafaa'apefai auro a le matagaluega, e leai lava se ofisa e le naunau i le sili. Fai mai Pole, tuu pea ia le matagaluega e fai latou.

O le ave faamalosi o se teine laitiiti 5 tausaga o se faamanatu malosi lea i matua. E tu vave mai ata o leona ma taika i Aferika, e lama e segi le tama'i manu mai le lafu. Talosia ia maua lea tagata a o le'i toe tupu mai se isi mea e sili atu le leaga.

Talanoa le Faasoa i le ita i lenei vaiaso, e iai le fagogo na tusia e le alii faatonu o le Samoana, Hermann Arp, e igoa, Moeita le Teine Tavini, manaia le igoa lea mo se teine. To'afia ni fanau e momoe feita ona o le faaita e matua, pe ona o le mole manava?

A ia manuia tele lenei vaiaso, faafoi mai se tala ua sese. Soifua.

O le alofa lava i le manu e

Mo i latou o lo'o saili ia Valenitino i lenei tausaga; saunia e LPS Tavita

*O le alofa lava i le manu e
Faalele, faalele, faalele*

Aisea le alofa i le manu ae le o se tasi mea? E tele ni taofi, ae manatu alii fatusolo e to'alua ma aupito ta'uta'ua a Egelani, e mafua talu ai o manulele e sili ona moni o latou alofa. O manu o ni faatusa o le alofa faamaoni i le lalolagi.

O lo'o pu'epu'emaui i upu o le pese o i luga pelega o le upu manu ia Samoa anamua, a o ta'aseu tamalii i le vao e saili le lupe e peisea'i o le sailiga o se tausala. O tala i seuga a aliiseu ta'uta'ua, e atagia ai le agaga tausili ma le fa'atautavā. O ai na te maua le lupe mua o le seuga, o ai fo'i e tele manu i lana titi.

O le tala i le seuga a Lefaoeseu ma Ulumu o se fa'ata'ita'iga lelei ma lausilafia. Fai mai ua fa'alele maunu ona ave lea le fa'aaloalo a le alii Savaii i lana uo asiasi e seu muamua. Ua misi lana seu ae maua e Ulumu ae lei faailoina ona o le tuualalo a lana uo seu. Ua maua le lupe a lana uo ona galo lea ia te ia le tulafono o le fa'atau fa'aaloalo. Tainane faiva o tamalii, e leai ni faaaloalo pe a malosilale le fia muamua.

E leai se manu a Samoa e sili lona aulelei ma moomia e pei o le lupe i lona vao ituaiga. Atili ai o se manu e nofo mamao ese, e filemu, e le femioa'i ma ta'aga masani a manu, e iloga i lo latou auauamamā ma le matagofie i le va'ai.

La lea e le faigata ona iloa le so'otaga o le ata ma upu e fatu i ai. A manuia se faamoemoe ona faapea lea le tuua, Ua matalupe le taeao. Ae a leaga ona lau lea le matape'ape'a o le matai. I la tatou laufatu o le alofa, e tumu la tatou titiula i ata onomea o sea manu.

Ae le na o Samoa, ua loa foi le faaaoga e tusitala Europa ia latou fatufatuga. O le mau a le tala faasolo e faapea o le alii fatusolo Egelani o Chaucer na muamua lava tusi sana solo e faataui i le Aso o Valenitino, e ta'u ai le lupe ma ona foliga manaia. Afua mai ai isi ata ma le vao gagana e tumu ai le gagana Peretania. Ae le ta'ua isi gagana sili atu le matutua.

E pei foi o fatuupu Samoa i na vaitau, sa fiafia i ata faatusa o seuga i le vao ma le sami. Ua fa'atusa le tamaitai i le lupe, po o le i'a o loo tuli e le tautai.

E pei ona pu'epu'emaui i upu o pese, faauualoa i ata o tala lausilafia; e iai lenei i se aloalii seuupe ma se auuso tamaitai. Aumai ai se ata manaia o le manu o loo sailia (lupe) ma lona faatusa tagata (tamaitai) faatasi ma le o loo saili (tulimanu).

E le filemu valea uma lupe e pei ona molimau le tala. E iloa foi e le lupe fika mai le pese i le o loo alu atu e tuli ia. Ae poto foi le seuupe ia e tali. E ta'u mai ai e le o se faiva e faapa'ole lona faiga. E alu tapena le tagata tutuli, tainane foi lupe.


Ae a o'o ina filifili le vao ma faigata le gagana ona tosi lea o le laina i lē e fou i le ta'alogā ma lē ua agavaa. Ina ua avatu le poloa'i a Puleleite i lana uo o Malietoa e sau ma aumai se tula o lana lupe, na lei mate'ia e le alii le uiga i le vaifetalaiga. Aisea na le ta'utino ai Pule o ia e mana'o i se lupe ae le o se tula? Pe ona o lona fa'aaloalo tele ua 'alo ai i le tula ae nana le 'auga tonu o lona mana'o—o sona to'alua?

E molimau talatu'u, e faitau aso faitau masina e ta'aseu ai tamalii i le vao ona o le tuliga o le manu. E leai se tasi e naunau e fo'i fua. Afai ua siliga i le ma'i o le tina le tatou ona fo'i—ae le ta'ua le maumau e iu i ai, ona tatou malamalama lea i le tulaga moni, e pei ona aumaia le tala ia Tupuivao e fai ma se fa'ata'ita'iga.

A o tala i le matalasi o le alofa lava ia e mafua ai mea uma, e leai sona tuaoi e pei lava o le agaga o le Aso. E pei ona tusi le Aposetolo, o le alofa e le musu gofie, e le fo'ifua tainane o oe o se tupu e tapui i sa ma mamalu. Aumai le tala ia Salamasina e fai ma faata'ita'iga.

Faatusatusa lea ma le tala ia Romeo ma Iulieta, faatusa o le alofa o talavou, e le mataofiofi; e ese mai i lenei e faufau pei o le tupu Eperu na soli le poloaiga ona o le mana'o fua i le manu a le isi aiga; e le logo malie sona faaiuga e pei o lenei ia Lopepe ma lona faiva uiga ese; ia ma le fuā e o faatasi; e pei o lenei o se tamalii Samoa na ia tulituliola si alii na uluai alofa i ai lana lupe. Ae a le alofa o le lupe e ufiufi e tau i le oti, e foa'i lona ola e sui ai lana uo e pei o la le Alii Faaola!

Tele fatuga matagofie a le lalolagi i le alofa ae sili ia te a'u na a le Tusi Tuai ma



alofagia, le tala ia Ruta ma Eseta ma Iakopo ma Iosefa ma le lisi e le uma. To'atele e talitonu o le Pese a Solomona o se faaleoga aupito mamā ma matagofie o le alofa mo tupulaga e tataui ona faitauina. A o ai se e le faagaeina i le valaau a le tulimanu: 'Auā, faauta mai ia, ua mavae le tau maalili, ua uma timuga. Ua iloa atu fuga i le fanua, ua oo mai le tau e teuteu ai vine; ua lagona foi le leo o le lupe i lo tatou nuu.' (2:11-12).

O le sailiga i le alofa o se mea e le gata ae fa'aauau pea. E le mo na'o manu laiti o loo tau saili a o manu matutua foi ua loa ma mafana mafutaga—ma e ua toe saili.

I le solo ta'uta'ua a Geoffrey Chaucer, *O le fono a manu*, Parliament of Fowls, o loo ta'utino ai le lupe po'a (alii) e faapea, afai e maliu lona aiga (lupe fafine), e le toe faia se isi ona to'alua. O le ta'utinoga o le faamaoni e masani ai manu ua moni le fealofani—ma le tautoga sa fai i le Alii.

I le o lea o le vaitau e foa ai tautoga, e faafou ai ta'utinoga, ma toe faaolaola le uluai alofa i sina mafanafana faaopopo.

O le sailiga ma le naunauta'i i le pa'aga e gata ai, po'o sē e tutusa loto, o le tupua e taumate. O ai na te iloa le ala i le loto o le tasi? E lelei le tupu e fai lona faletautu, e le tigaina e tau saili. I nei fo'i aso a tele au tupe e o mai lava lupe latou ma mauulu i lau upega. Ae e le mafai e tupe ona fa'aailoa mai le e alofa moni ia oe ma lē e alofa i au tupe.

Ae na iloa e Paulo le fili ae e lei aliali mai, e mafua ai lana tomatau, e lelei le faaipoipo ae leaga le mana'o. Auā o ai se na te lavā tete'e atu i le pa'ō leotele a le faitoto'a pe a tu'itu'i faalua mai!

E to'atele le auseu faalepopoi ua manu'a ai loto, ae le tatou ona faia'ina ai le agaga saili. Tatou te fa'atali teisi, po'o afea e toe tu'itu'i ai le faitoto'a o o tatou fatu. Pe tatala pe leai? O le fesili lenei—fai mai ai le fatusolo. I lenei vaitau o le alofa ma le fealofani o manu i uluulu la'au atonu e maua ai se faaiuga.

Afai e toe tatala lou faitoto'a ae oso mai o se isi fo'i pe'a vao, ia 'aua e te ita o le taaloga e tigaina, a ua tatou ona e iloa fai se 'afu o manu faapeaina. Ae a oso mai o se lupe, faitau lenei o lau meaalofo mai ia Sagato Valenitino.

Ae afai e te le gae'e lava oe i tupua ma taumatega alofa a manu, atonu la o lou alofa e mo agelu ma sagato ma isi mea e sili atu.



Sponsored by Evaleon Books

LOUTALA FA'ASOLOPITO SAMOA HISTORY

"Ne'i mea ane na galo"

14—20 Fepuari

14

1975 Melepone. Malo Ali Afakasi fusi Emepaea (light welter) ia Rocky Mattioli, TKO 12

1872 Tutuila. Saini feagaiga Maude ma Mauga i Pago Pago

15

1971 Taunuu i Apia se turisi, Yoshikasu Saito ma leiloa ai

16

1999 Apia. Taofia le faatauina atu o le lomiga a le Samoa Observer i se poloaiga mai le Faamasinoga

17

1887 Saini se feagaiga i le

va o Samoa ma le malo o Kalakaua o Hawaii

18

2005 Folafola e le Peresetene Amerika, G.W. Bush avea o Amerika Samoa ma nofoaga ua lepetia talu le Afa o Olaf; tele se afaina o Manu'a

1903 Tofi e Kovana Solofa se Komisi o Fanua ma Suafa; 14 matai Samoa tofia o ni fautua ae le o ni sui

19

1900 Saini e le peresetene Amerika o McKinsley se poloa'iga tuuina atu ai motu o Tutuila ma Manu'a i le tausiga a le Neivi Meleke



Ua maua ea se iuga i le tala ia Yoshikasu Saito?



O le asō, aso 15 e atoa ai le 45 tausaga talu ona taunuu se turisi Sapani i Apia ma leiloa ai. Ae e iai lona igoa e iloa ai e lona aiga ma uo ma pa'aga faigaluega, o Yoshikasu Saito. E le taumate o loo latou manatua o ia pe faamanatu foi lenei pine ua aulia ia latou kalena i se vaega o se tala e lei maua se faaiuga. E avea ai le tala i le alii Sapani ma se tala tulaga ese, ua le ese ma se ata tifaga po o se tala e masani ai nuu i fafo i se ua maliu fasia i se aupega a se fasioti tagata. O ai lena tagata po tagata? E tatau ona iai sona igoa ma se faasinomaga. E oo mai nei e lei maua ni tali o na fesili, auā o tala fatu e iai faaiuga, a o tala moni ma leaga e le faigofie ona ava'e i luga.

E faigata ona talia sea mea i se nuu e pei o Samoa. Kerisiano, e le masani ai i ni faiga saua i taimi filemu. E leai foi se mea e lilo i le faalogo ma le vaai. E malosi le taofi e iai nisi o loo latou silafia le mea moni, a ua faigata ona toe faailoa mai i lenei taimi, aemaise o le afaina ai o le igoa ta'uleleia o aiga ma nuu.

Afai foi o se tasi mafuaaga, e faigata lava ona faavasega. E leai ni manu fe'ai po o ni vanu loloto e lilo ai. E manatua i lena taimi na tulai mai ai le mataupu na talanoa ai tamaiti a'oga ma ta'u igoa o aitu tamaitai e lausilafia e le atunuu. O le faailoga lea ua siliga se tali a leoleo i le misitelio.

Afai e sa'o le mate, e oo mai i le taimi nei e leai se isi na molia pe masalomia. E taumate foi po o le a se faaiuga a leoleo na fai, po o matala pea le faila po ua leva le tapuni. Ae le uma le tuufesili pea poo le a le mea na tupu ia Yoshikasu Saito, ua 45 nei tausaga.

TALA FAASOLO O NIU SILA

- 14 Fep 1915 Auina le ulua'i vaegaau Maori i le taua; 500 tuua Ueligitone mo Aikupito
- 15 Fep 1978 Malo Niu Sila ia Egelani taaloga kilikiti mo le uluai taimi; iloa ai le taalo a Richard Hadlee
- 18 Fep 1982 Maliu Ngaio Marsh, tusitala lauiloa i vaitausaga 1920 ma le 1930

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING

Telefoni (09) 269-6186. Emeli: evaleon.books@gmail.com

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.

Sponsors:

New Zealand
Lottery Commission

Evaleon Books &
Niupac Publishing

Wheeler's Books
(NZ)



O LE PENINA

Vaega 1: O LE FOMA'I



E to'afā le auāisi i luma o le falesā. Ua leai se mea i le aai latou te lē iloa. E ô i le lotu e fa'alogologo a o fai ta'utinoga a fafine talavou, ona tutū lea ma fa'atalitali le taimi e gasolo mai ai i fafo, a ua latou iloa uma ā latou āgasala sa fai. E leai se tama'i gaoioiga e misi iā i latou nei, e ô'o lava i solitulafono tetelē. E momoe ālaāla e fa'alogologo i tagata e sulufa'i āne ma fai ā latou ta'utinoga fa'alilolilo i le pogisā. Latou te iloa uma. Latou te iloa fo'i le foma'i. Latou te iloa mea na te lē iloa, ôna mata sauā, lona fa'aleālofa, ôna vaivaiga, ôna mana'oga, āna āgasala. Latou te iloa pepe fa'apa'u'ū ma nai sene fa'atauva'a na te foā'i i ē āisi o le aai. Ua latou va'aitino i tino ôti o āna ma'i e avatu i le falesā. Ma talu ai ua uma le misasā o le taeāo, ua āvanoa ai e mulimuli ātu i le solo. Latou te matuā fia iloa po o le ā le mea o le a fai e le foma'i puta gaele paie i si pepe ua ū e le akarava.

Na taunu'u le solo i le faitoto'a tele o le pa o le fale o le foma'i. Na latou lagona atu le gāsēsē o le vai ma le pepese a manulele fagafao ma le ape a mata o pulumu uumi i luga o le folama'a taugatā. Na latou lagona ātu fo'i le sasala o fasipua'a fa'aāsu falai mai totonu o le fale o le foma'i.

Na fa'aletonu Lino. O le foma'i e lē o se tasi o lona itu'āiga. O lenei foma'i e tau i le itu'āiga sa fa'asauā ma fa'amativa ma gaoi ma inoino i lona itu'āiga; ua avea ma mea e fefefe ai, ma mafua ai ona ô mai ma le loto maulalo i lona faitoto'a. Ua masani ai Lino, o so'o se taimi e felāta'i ai ma se tasi o i latou nei, e

lagona lona popole, le fefe ma le ita i le taimi e tasi. E ô fa'atasi le fa'alii ma le mata'u. E faigofie iā te ia ona fasioti le foma'i i lo le talanoa i ai, talu ai o foma'i uma o lenei itu'āiga latou te tautatala fa'atatau i le itu'āiga o Lino e pei o ni meaōla vālea. A o si'i lona lima e 'u'u le ū'amea o le logo na ia lagona le ita tele ua totolo ā'e i totonu iā te ia, le tu'i o le musika a le fili i ôna taliga, o ôna laugutu ua mamau i ôna nifo—ae aapa a'e lona lima tauāga-vale e to ese lona pulou. Na laulogo le pa'ō a le mama ū'amea i le puipui. Na tu Lino ma lona pulou e 'u'u i lona lima. Ua lagona le ôi o le pepe o lo'o i lima o lona tina, ua tautala lemu atu i ai o ia. Ua fetaōmi mai le solo umi mai itu uma, latou te fia lagona lelei uma upu o le a fai.

E le'i pine ae matala le faitoto'a tele. Na o sina āva. Na iloa ātu e Lino se togāla'au matagofie lanulau'ava. O lē o lo'o talanoa ane iā te ia o se tasi o lona itu'āiga. Na talanoa ātu i ai Lino i lana gagana. 'O le tama laitiiti - o lana ūlumatusa—ua 'ona lona tino i le ū a le akarava, o lana tala lea. 'E mana'omia le tomai o se foma'i.'

Na toe mapuni teisi le faitoto'a, ae lē fia talanoa mai fo'i le auauna i le gagana a Lino. 'Fa'atali mai,' o lana tali lea. 'So'u ālu e ta'u le fe'au,' ma ia tapuni mau le faitoto'a. Na lafoia āta o le ausi'ima'i i le puipui pa'epa'e.

I lona potu malolo o lo'o saofa'i ai le foma'i i luga o se moega mauāluga lava. O lo'o fai lona peleue moe lanu silika veloveta na fa'atau mai i Pale. I luga o ôna vae se laulau apa siliva o ia se tipoti siliva ma se tama'i sasa



siliva, ua lē tusa ai lona manifinifi ma le telē o le lima ma tamatama'ilima lapopo'a o lo'o tau fa'aōfiōfi i se tama'i 'au. O lo'o āutilo ma matau gauga ma aano. Ua fa'ateleina lona lapotopoto, o lona leo ua oolo ma le ga'o ua fusia lona ūa. I ôna autafa se laulau o ia se logo Oriena ma se pusa tapa'a. E pogisā ma paū teuga o le potu. O ia ni āta lotu, e pei o le āta o lona to'alua ua maliu, pe ana mafai i āna tupe ona toe fa'aola mai po ua faia lava, a o lea ua ālu i le lagi. Sa avea o ia ma se foma'i i Farani i le mea ua iloa o le lalolagi tele, lenei na o manatuaga ma le momo'o e toe fia fo'i. O le ôlaga sili lona—o lona ūiga e mafai i sina tologi ona tausona to'alua fa'apouliuli ma ô e āsiāsi i fale'aiga. Na toe ligi lana ti ma aapa ātu i se masikeke ae ūlufale mai loa le auauna i totonu.

'Ia?' o lana fesili lea.

'O se tama'i Initia ma sana pepe. Fai mai ua ū e se akarava.'

Na tu'u lemu ifo i lalo e le foma'i lana iputī. Ona fa'afuase'i lea le sasao ā'e o lona ita.

'Ua leai ea ni ā'u fe'au āogā e fai nai lo le togafiti o ū a iniseti mo na tama'i Initia? O ā'u o le foma'i, e lē o se foma'i manu.'

'E moni lau susuga,' o le tali lea a le auauna.

'E ia sana tupe?' o le fesili lea. 'Leai, e leai ā ma ni tupe. Na o ā'u le foma'i i le lalolagi e galue fua—ua ou lē lavā fai lona mea. Alu e fesili i ai pe ia se tupe!'

Na tatala fa'aitiiti le faitoto'a ma fesili loa i le gagana e malamalama ai Lino.


'E ia se tupe mo le togafitiga?'

Na aapa ifo lona lima i lalo i totonu o lona pulupulu. Na to mai i fafo se pepa ua ātufia lona gaugauga. Ua talatala mālīe ona iloa ātu lea o ni fatu ūli se valu o penina, eefu ma auleaga. Na ave e le auauna le pepa i totonu ae le'i umi ona ālu. Na ia tatala mai le faitoto'a ma tu'u mai le pepa iā Lino.

fa'aauau i le itulau e 8

UILI FAU UPU

Saili tali o fesili o lo'o i lalo. Pule oe pe sipela i luma (clockwise) tua (anticlockwise). E sa le feosoosofa'i.



1. Ta'u mai ni soa se tolu o le *malu* i le Igilisi: _____
2. Saili ni fausaga o le upu *ta'u* _____
3. Su'e le upu *taumalua*; tusi sona faamatalaga: _____
4. Tusi uma upu/ fuiupu e ta'i 4-8 mata'itusi, ma o latou soa i le Igilisi (E faitau ai ma upu ta'ua i le 1, 2 & 3)
Lelei atoa = 12 upu
Lelei tele = 8 upu
Lelei = 6 upu

SUDOKU #3 (TAALOGA I NUMERA)

	8	2				7		
	9		2		6		4	
3				8				5
		3						6
	5	8			1	2	3	
7					3	8		
6				4				2
	2		9		7		5	
		5				4	7	

FAIGOFIE / FEOLOOLO / FAIGATA

©sudokuessentials

Fa'atumu pusa numerata (tama'i sikuea) i fuainumera 1 i le 9. Ia uma ane le galuega ua maua atulaina ta'itasi (tu, fa'alava) o iai le 1 i le 9. E tofu le atulaina ma lona fa'atulagaga e ese mai le isi.

TALI GALUEGA OLA 02

UILI FAU'UPU #02

1. aai—village; aai—town; aai—eat (pl.)
2. ilo—iloilo, iloina, iloga, iloiloilo, faailo, faailoilo
3. faailo: veape galueai-ina, nauna, se vaega o le nauna sosoo. Ta'u atu se fe'au i se faiga e iloa ai e nisi; se faiga e iloa ai. Na faailo mai le vaamau i gauta ae le iloa e le fili ~ Ua iloa atu e i latou le faailo ~ Ua ta mai se logo faailo, ua fefefe ai tamaiti.

4. fa'a'i—throat; faailo—signal; faailoga—sign, to mark, celebrate, mark, symbol; gafa—genealogy, lineage; ailoga—maybe not, it is unlikely, doubtful; loga—hiccup

8	3	6	5	2	9	1	7	4
2	9	1	7	4	3	8	6	5
4	7	5	8	1	6	2	9	3
5	4	8	6	3	2	7	1	9
3	6	9	1	7	5	4	8	2
1	2	7	9	8	4	3	5	6
9	1	4	2	6	8	5	3	7
7	5	3	4	9	1	6	2	8
6	8	2	3	5	7	9	4	1

TALI SUDOKU #02

Akira Ioane
Auckland Grammar
Joseph Parker
Marcellin College
Lydia Ko
Pinehurst School
Rieko Ioane
Auckland Grammar



F	U	A	T	A	M	A	U	S	A
E	M	L	E	A	M	T			
I	O	A	N	E	T	E	U	G	A
L	T	S	E	A	K	M			
O	L	A	G	A	M	A	U	G	A
A	G	N	O	A	K	I			
I	S	A	I	A	U	N	A	I	
I	G	A	U	O	O				
T	A	U	A	O	F	I	G	A	
M	G	U	I	G	A	N	U		
S	A	U	A	I	M	A	T	E	

© PasoSamoa, 1988

PASO SAMOA

Faauma e oe le paso i soo se upu e fetau ma iai se uiga —taga'i i faatonuga i lalo.

	A													
F	E	L	E	L	A			M	A	U	A			
A														
T				A				A	O	A	O			
A				M										
I				U				A						
	I	S	A	I	A			F		A				
T				A				A						
A	U	L	I		M	A	I	M	A	U				
						L								
A	F	I	S	I				L						

	1		2		3		4		5					
6		7					8							
					9									
10				11			12	13		14				
						15								
16	17		18			19	20		21					
	22	23					24							
25						26								
27					28				29		30			
				31										
32						33								

- A. Faaaoga le pusa pito i luga e fai ai lau galuega, ona sii ifo lea o au tali i le pusa o i lalo.
- E. Tusi i lalo soa o au upu i le gagana Peretania. (Faalava/Lalo). Faaaoga se tusiupu (dictionary) e fesoasoani.
- I. E pule lava oe i le upu, pau le mea ia fetau ma le faata'otoga o isi upu.

POLE MA PAPA





PASI ATU LA
TATOU PULETINI
I LE TOU A’OGA,
AIGA, LOU TUAOI,
LOU USO,
AU UO, OU AIGA
I SAMOA MA NUU MAMAO

E AOGĀ MO LE
FANAU A’OGA

Manatua Lupematasila Nuusavili Siutaia, tuua le mafutaga lua nei tausaga talu ai. O ia se tasi sa tu malosi i polokalame e faaaoga ai la tatou gagana

www.ola888.com



Faaaauau:

o le penina . . .

‘O lo’o âlu le foma’i e va’ai se ma’i tigaina. Ma tapuni mai le faitoto’a ma ôna foliga māsiasi.

Na lofia le solo atoa i lea lagona. Ua taufai tu’umuli ma ta’ape’ape ta’ito’atasi. O le auāisi i le poletito o le falesā, o le aufaitatala ua ta’ape e tala’i le tala, o ūso tuā’oi ua toe fo’i i ô latou fale lau, e mumusu e tilotilo âtu i le faalumaina o Lino ma Susana.

Na umi se taimi o tu pea Lino i luma o le faitoto’a, ma Susana lona to’alua i ôna tafatafa. Na tu’u â’e lemu lona pulou i lona ūlu. Ona fa’afuase’i lea ona îa tu’i le puipui ū’amea i lana moto.

Na âutilo îfo ma le lē mautonu i lona lima ua îsi ma le toto ua tafe îfo i ôna vailima.

fa’aaauau i le vaiaso fou (Vaega 2)

O ni fautuaga i le ita

Aua nei faaitaina oe e se isi, ne’i ona pulea oe. Aua lava e te avea i ai lena pule. E le iloa le tusiupu

E leai se eseesega o le ita ma lou inuina o se vailaau oona ma e tatalo ia fano le isi. Puta

E faavae le Malosi o se tagata i lona te’ena o le ita ma ona tiga. E le iloa

O le mafaufau o le tagata e faagesegese ai lona ita, o lona viiga foi lea, ina ua le manatua lona agaleagaina. Faataoto 19.11

O lenei, o’u uso pele e, ia ta’itasi le tagata ma faataalise ona faalogu, ia faatelegese ona tautala atu, ia faagesegese ona ita. Iakopo 1.19

I le mea o iai le ita, o loo iai le tiga i lalo ifo. Eckhart Tolley

Opo mai le ita, a’oa’i lelei ma tuli i lona aiga. O se upu mai se solo

ATI A'E UPU

paeonia. Vasega: nauna. Vaeveaga o le faaleoga: pae-o-nia. Uiga e faaaoga ai: o se tagata na ia uluai nofoia pe faato’a se nuu fou poo se laufanua. Mai le Igilisi pioneer. Faaaogaga: O Pili o se paeonia Samoa.